



UMP, Miyazu Perkasakan Industri Pembuatan Acuan



Dalam usaha merencanakan jalinan kerjasama industri, Universiti Malaysia Pahang (UMP), baru-baru ini menandatangani memorandum persefahaman dengan pihak Miyazu (Malaysia) Sdn. Bhd (MMSB) sebagai usaha membangunkan industri pembuatan acuan atau Tools, Dies and Mould (TDM) di Malaysia.

Kerjasama ini dijangka dapat mengembangkan industri pembuatan tempatan dengan meminimumkan bilangan pengambilan kepakaran asing serta mengurangkan kebergantungan kepakaran dari luar negara. Keupayaan tenaga mahir tempatan dan pakar dalam pembuatan acuan ini menyokong ke arah perkembangan industri automotif negara.

Menurut Naib Canselor UMP, Profesor Dato' Dr. Daing Nasir semasa berucap dalam majlis itu berkata, bersesuaian dengan pendekatan UMP sebagai kilang pengajaran (*teaching factory*) serta struktur kurikulum yang menekankan aspek kompetensi dan praktikal, kerjasama ini akan dapat menambah daya saing pelajar bidang kejuruteraan

pembuatan dengan berkongsi kepakaran serta pengalaman pihak Miyazu.

“Kerjasama ini juga memberi peluang bagi kakitangan MMSB untuk meningkatkan kemahiran dan pembelajaran melalui skim perantisan dan ijazah lanjutan di UMP.

“UMP merancang melantik tenaga pakar dalam bidang TDM ini dari universiti luar negara dengan menjalinkan kerjasama dengan pihak Kaohsiung University of Applied Sciences di Taiwan, Seoul National University of Technology dan Iwate University di Korea Selatan tidak lama lagi,” katanya.

Beliau berkata, inisiatif ini mampu mengangkat keupayaan dan kepakaran UMP dalam pengembangan pengajaran, penyelidikan dan pembangunan bidang TDM ini.

Manakala, menurut Ketua Pegawai Eksekutif Miyazu (Malaysia) Sdn. Bhd. , Amrizal Abdul Majid, selain dari kepakaran dan keperluan peralatan seperti mesin, pihaknya juga sedang membangunkan industri sokongan bagi menguatkan industri TDM ini.

Katanya, usaha ini akan menjadikan

Malaysia lebih kompetitif dalam bidang pembuatan acuan (dies) seperti di negara Jepun dan Korea.

Beliau mengharapkan kerjasama ini dapat memberikan nilai tambah kepada UMP dan MMSB dalam menerajui bidang inovasi dan kreativiti untuk diperkembangkan ke peringkat industri.

Majlis menandatangani memorandum persefahaman (MoU) itu menyaksikan UMP diwakili oleh Naib Canselornya, Prof. Dato' Dr. Daing Nasir Ibrahim dan Timbalan Naib Canselor (Penyelidikan & Inovasi) Prof. Dato' Dr Mohd Rosli Yunus, manakala, Ketua Pegawai Eksekutif Miyazu (Malaysia) Sdn. Bhd, Amrizal Abdul Majid dan Ketua Pegawai Operasi Miyazu (Malaysia) Sdn. Bhd, Shoichi Araya mewakili pihak MMSB.

Hadir menyaksikan majlis tersebut ialah Lembaga Pengarah Miyazu (Malaysia) Sdn. Bhd, Dato' Zainuddin Che Din, Pengarah Pusat Kecemerlangan Automotif, Haji Paudzi Abdullah, Pengarah Pusat Hubungan Universiti Industri, Profesor Dr. Shamsuddin Baharin dan pegawai UMP dan MMSB.